

TEZĂUR LITURGIC

11 OCTOMBRIE

ACATISTUL SOBORULUI SF.OPTINEI I



MOSCOVA, 2000



Акафист преподобным старцам Оптинским

Кондак 1

Избранным Богом от суетнаго мира, вам, о
преподобнии отцы Оптинстии, крест свой
благоговейно подъемши и Христу
последовавшим верою, яко дерзновенным
предстателем нашим пред Господом ныне
усердное моление приносяще, с любовью
взываем:

Радуйтесь, преподобнии отцы Оптинстии,
благодати старчества светильницы.

Икос 1

Ангельскаго иноческаго жития всем сердцем
взыскавше, вся мирская пристрастия
отвергосте, Богомудрии, и во объятия Отча с
любовию в обитель Оптину притекше, путем
тесным и прискорбным до конца дней ваших
шествовасте. Сего ради воспеваем сице:

Радуйтесь, на зов Господень радостно
притекшии;

радуйтесь, всем желанием Христу
последовавшии.

Радуйтесь, крест свой на рамо восприимшии;
радуйтесь, паче Господа ничесоже

возлюбивший.

Радуйтесь, Христа ради всеконечно себя
отвергшийся;

радуйтесь, Царствия Божия блаженнии
наследницы.

Радуйтесь, преподобнии отцы Оптинстии,
благодати старчества светильницы.

Кондак 2

Видевше сети диавольския, аки паучина в мире
распростертая, и во глубине сердец ваших
восчувствовавшие, яко от них человецы токмо
смирением спасаются, себе самех в теплой
молитве пред Господом повергосте, со
умилением взывающе: Аллилуиа.

Икос 2

Разумевше сердцем и умом, яко дела своими не
оправдится пред Богом всяк живой, и присно
содержаще пред очесы вашими согрешения
своя, токи слезныя, единому Господу зримыя,
источати не престасте, покаяние души Ему
приносяще, Егоже образ покажете нам,
взывающим:

Радуйтесь, грехи своя неприкровенны
прозревавши;

радуйтесь, дар умиления и слез от Господа
приявши.

Радуйтесь, блаженство плача о гресех

познавшии;
радуйтесь, неусыпающую скорбь о них
стяжавшии.

Радуйтесь, на земли покаяния проповедницы;
радуйтесь, на небеси ныне Господем утешаемии.
Радуйтесь, преподобнии отцы Оптиностии,
благодати старчества светильницы.

Кондак 3

Силу искупительных страданий Христовых
положите, святии, яко нерушимую надежду
спасения, себе самех хуждшими всех человек и
никоеяже милости достойных помышляюще, и
сего ради со многим смирением и благодарением
присно вопиясте Богу: Аллилуиа.

Икос 3

Имуще в сердцах своих Божественный
смиреномудрия дар, истинные ученицы
Христа, смирившаго Себе даже до смерти
Крестныя, ни во чтоже вменисте вся подвиги и
труды ваша. Возрастающим бо подвигом, сугубо
возрасташе и смирение, емуже дивящися,
глаголем:

Радуйтесь, послушанию и смирению Спасителем
наученнии;

радуйтесь, за смирение Господем Славы
вознесеннии.

Радуйтесь, безгневия и кротости смирением

достигшии;
радуйтесь, смирением и самоукорением покой
душам обретшии.

Радуйтесь, нищетою духовною обогатившиися
избранницы;

радуйтесь, ваше бо есть Царствие Небесное,
нищим духом уготованное.

Радуйтесь, преподобнии отцы Оптинстии,
благодати старчества светильницы.

Кондак 4

Бурю страстей, плотию и диаволом
воздвизаемую, утоляюще, ум владыку над
страстями пагубными постнически постависте,
мужески бо естество понудивше, потщастесь
благодатию Божиею худшее покорити лучшему
и плоть поработити духу, Подвигоположнику
Христу пети не престающе: Аллилуиа.

Икос 4

Слышавше глагол Господень, яко Царствие
Небесное нудится и токмо нуждницы
восхищают е, постом, бдением и молитвою
непрестанно подвизастесь и плоть свою со
страстями и похотями Христови распясте,
уставы иноческия нерушимо соблюдше. Темже
ублажаем вы:

Радуйтесь, благое иго Христово люботрудно
понесшии;

радуйтесь, трезвением сердечным духа не угасившии.
Радуйтесь, крепкое хранение устом своим полагавшии;
радуйтесь, тела своя нещадно утеснявшии.
Радуйтесь, с телесными подвиги умное делание сочетавшии;
радуйтесь, в терпении вашем души ваша стяжавшии.
Радуйтесь, преподобнии отцы Оптинстии, благодати старчества светильницы.

Кондак 5

Светоносное имя Иисусово, яко оружие непобедимое противу бесовския рати, непрестанно в сердце с верою носяще, приснотекущий источник благодати обретосте, восходяще от силы в силу и огонь ко огню прилагающе, очищенным смыслом воспеваете Богу: Аллилуиа.

Икос 5

Прозревающе всечасно немощь свою и спасительную, благодатную силу молитвы Иисусовой, николиже престасте творити ю, страстей прилоги тою посещающе и вся козни вражия попоаяюще, в безмолвии сердца молитвенное собеседование с Господем таинственно обретше, нас научаете взывать

вам:

Радуйтесь, весь ум свой в молитву погрузивший;
радуйтесь, всецело горе сердца своя имевший.

Радуйтесь, на молитве ни о чемже суетнем
помышлявший;

радуйтесь, имя Иисусово неусыпно
призывавший.

Радуйтесь, молитвы сердечныя изряднии
подвижницы;

радуйтесь, вся просимая во имя Господне
получавший молитвенницы.

Радуйтесь, преподобнии отцы Оптиности,
благодати старчества светильницы.

Кондак 6

Предстояще сердцем в молитве пред Крестом за
грехи людския страждущаго Господа, рыданием
возрыдасте, преподобнии, скорбию о гресех
своих снедаеми и неизглаголанною любовью к
Искупителю нашему возгорающесе, до конца
жития убо трепетно взываєте Ему: Аллилуиа.

Икос 6

Воссиявшу в сердцах ваших свету любве
Божественныя, славу земную и похвалы
возненавидесте и омерзисте, безчестие же от
человеков и всякия скорби отверстым сердцем
радостно приемлюще, поношению Христову
усердно приобщистесе. Нам убо образ

злострадания и терпения покажете, зовущим:
Радуйтесь, язвы Господа Иисуса Христа на теле
своем носивший;
радуйтесь, поругания, яко врачевство
чистительное, усердно пивший.
Радуйтесь, от почестей земных всем сердцем
отвратившийся;
радуйтесь, за ненавидящих вас с любовью
молившийся.
Радуйтесь, обидящих вас, яко благодетелей,
возлюбивший;
радуйтесь, благодарити Милосердаго Господа
николиже преставший.
Радуйтесь, преподобнии отцы Оптинстии,
благодати старчества светильницы.

Кондак 7

Хотяй Господь всем человеком спастися и в
разум истины приити, видя ваше благое
произволение и труд непрестанный в
исполнении заповедей Его, отверзе вам ум
разумети пути Своя и оправданием Своим научи
вас. Темже сердцем просвещенным выну
воспевайте: Аллилуиа.

Икос 7

Дивна дела Твоя, Господи, яко паче книжник
вразумляеши рабов Твоих, всем сердцем
взыскующих Тя, и открываеши очи их, да

уразумеют чудеса от закона Твоего. Блажим убо преподобных Твоих, отцев наших Оптинских, присно поучавшихся в заповедех Твоих, яже возлюбиша зело, и поем им:

Радуйтесь, словеса Божия, яко богатство много, в сердце сокрывшии;

радуйтесь, путие заповедей Божиих всем сердцем возлюбившии.

Радуйтесь, всяк путь неправды омерзившии; радуйтесь, от пути Господня николиже отступившии.

Радуйтесь, в добром подвиге уготовившиися и не смутившиися;

радуйтесь, слово Божие вместилище, мир мног во Христе обретшии.

Радуйтесь, преподобнии отцы Оптинстии, благодати старчества светильницы.

Кондак 8

Странников и пришельцев на земли себе помышляюще, ничесоже от тленных вещей мира сего стяжати себе не возжеласте, да не будут сердца ваша к земли влекома, обаче к единому Богу прилепистесь, чисте возносяще Ему песнь: Аллилуиа.

Икос 8

Всякое плотское пристрастие, от любви Господни отлучающее, вседушно отвергосте,

единое на потребу взыскующе. Всегда убо при
ногу Иисусову неотторженною приседесте
любвию, ко благом житейским сердца не
прилагающе и все упование свое на Господа
возложивше. Темже похваляем вас, святии:
Радуйтесь, без пристрастий к миру житие свое
скончавший;
радуйтесь, от земных забот свободившися,
сладость чистых молитв познавший.
Радуйтесь, твердою верою попечения житейская
отложивший;
радуйтесь, нестяжанием и послушанием
пагубныя страсти умертвивший.
Радуйтесь, иноческий обет нестяжания свято
соблюдавший;
радуйтесь, волю свою отсекая Христовы
послушницы.
Радуйтесь, преподобнии отцы Оптинстии,
благодати старчества светильницы.

Кондак 9

Вся молитвы ваша и вся силы ваша подвигоште,
преподобнии, во еже стяжати чистоту душевную
и телесную, без неяже, по словеси Христову,
никтоже узрит Бога; темже убо чистым сердцем
сподобистесь в раи Господни достойно воспети
чудную праведных песнь, зовуще: Аллилуиа.

Икос 9

Воюющих на душу плотская вожделения постом и молитвою укрощающе, помыслом греховным возобладати вами не попускаете, от Господа Бога, единого власть имущаго побеждати естества чин, дар чистоты и целомудрия приясте. Приимите убо и от нас хваления таковая:

Радуйтесь, благодать Божию в борьбе с плотию смирением привлекая;

радуйтесь, труды и лишения возлюбивше, покой телесный отринувши.

Радуйтесь, постом и всенощными молениями похоть плоти умертвивши;

радуйтесь, естества уставы силою Христовою победивши.

Радуйтесь, тела и души ваша чисты Господеви принесши;

радуйтесь, чистии сердцем, Бога в вечном блаженстве зрящи.

Радуйтесь, преподобнии отцы Оптинстии, благодати старчества светильницы.

Кондак 10

Спасти хотяще души своя для жизни вечныя, вся помышления о земном и привременном отринуте и Спасителю нашему, заповедь велику о любви учеником Своим давшему, делом и истиною последовасте. Сего ради ближних

ваших теплою любовью тогда возлюбисте,
Небесному Отцу всех человеков зовуще:
Аллилуиа.

Икос 10

Возлюбивше всею душею ближняго своего,
Царствие Божие внутри себе обретосте, темже
сниде в сердца ваша огонь пополаяй любви
Божия, еюже необыменно насыщающесе,
всецело себе в жертву делом любви принесосте.
Ныне же и от нас благоговейное пение сие
слышите:

Радуйтесь, всех человеков святою любовью
возлюбившии;

радуйтесь, во еже некия спасти, всем вся
бывшии.

Радуйтесь, о горестех людских слезно
воздыхавшии;

радуйтесь, всех притекающих в сердцах своих
вмещавшии.

Радуйтесь, тща от себе никогоже отпускавшии;

радуйтесь, души ваша за ближних полагавшии.

Радуйтесь, преподобнии отцы Оптинстии,
благодати старчества светильницы.

Кондак 11

Пение молебное приносим вам, преподобнии
отцы наши Оптинстии, вашею бо стезею
воистину право ходити познахом. Блажени есте,

Христу работавшии и вражию посрамившии силу, истинное правило добродетели покажется всем, Господеви зовущим: Аллилуиа.

Икос 11

Светлая подвиги ваша похваляюще,
преподобнии отцы наши Оптинстии, ублажаем
вас, яко славных наставников монахов и чудных
собеседников Ангелов ныне на небеси Престолу
Божью предстоящих и молящихся о нас, с
любовию поющих вам:

Радуйтесь, трезвения непрестанного усерднии
ревнителе;

радуйтесь, пламени сердечнаго неусыпнии
хранителе.

Радуйтесь, непоколебимии столпи послушания,
вся претерпевшии;

радуйтесь, многими скорбьми в Царствие Божие
вшедшии.

Радуйтесь, иноческаго жития равноангельнии
подвижницы;

радуйтесь, добрии раби Божии, блазии и
вернии.

Радуйтесь, преподобнии отцы Оптинстии,
благодати старчества светильницы.

Кондак 12

Благодати дар испросите нам у Господа, вас, о
блаженнии, верно хвалящим. Вонмите

воздыханием нашим, слез наших не презрите. Умолите Господа утолити лютыя страсти наша, дати нам плач сокрушенный о гресех наших, да чистою душею и неоскверненными устнами купно с вами сподобимся в раи Господни воспевати: Аллилуиа.

Икос 12

Поюще ныне вас, о преподобнии, хвалебными гласы, вемы, яко не пения устен взыскуете, но подвигом вашим последования, смирения сердечнаго и жития исправления. Темже в покаянии помощи вашае просяще, любовию же подвигаеми, глаголем:

Радуйтесь, добре жительствующих ограждающих;

радуйтесь, немощных и сирых укрепляющих.

Радуйтесь, падающим руку помощи простирающих;

радуйтесь, кающимся слезы утешительныя низпосылающих.

Радуйтесь, всем призывающим вас скории помощницы;

радуйтесь, спасения нашего пред Богом теплии ходатаи.

Радуйтесь, преподобнии отцы Оптинстии, благодати старчества светильницы.

Кондак 13

О преславнии угодницы Христовы, преподобнии отцы и старцы, Моисее, Антоние, Исаакие, Иларионе, Анатолие, Иосифе и Второй Исаакие, Льве, Макарие, Амвросие, Варсонофие, Второй Анатолие, Нектарие и Никоне, яко семь столпов и семь светильников в Оптиной обители просиявшии! Нынешнее наше моление услышите и испросите нам у Господа смирение и память смертную, да избавит нас Господь от всякаго зла и сподобит христианския кончины всех вопиющих Ему: Аллилуиа.

Этот Кондак читается трижды, а затем Икос 1 и Кондак 1

Молитва

О велиции угодницы Божии, столпы и светильницы Земли Российской, преподобнии и богоноснии отцы наши Оптиной, Льве, Макарие, Моисее, Антоние, Иларионе, Амвросие, Анатолие, Исаакии и Иосифе, Варсонофие, Анатолие, Нектарие, Никоне и Исаакии, по закону Евангельскому Господа Бога всем сердцем и всею душою и всем разумением возлюбившии и всему народу Божию во спасение бывшии; сего ради под покров Пресвятыя Владычицы нашея Богородицы во обитель Оптину, покаявшимся разбойником

основанную, притекшии, путем тесным и прискорбным смирения и самоукорения до конца дней ваших ходившии, темже убо благодатныя дары святаго Духа преизобильно стяжавшии; старых и молодых, знатных и препростых, мудрых века сего и худоумных, никогоже от грядущих к вам ижденувшии, николиже тща и неутешна отпустившии, но светом истины Христовы всех просветившии и духовно воскресившии, ближних ваших, яко себе самех, возлюбившии и тех в сердце своем вместившии, по словеси Апостола, пророчествующе и назидающе, увещающе и утешающе. Умолите Милосердаго Господа, во обитель райскую разбойника благоразумнаго с собою взямшаго, даровати нам, недостойным, яко работником единонадесятаго часа, дух сокрушения, сердца очищение, уст хранение, правоту деяний, мудрование смиренное, слезы покаяния, веру непостыдную, любовь нелицемерную, мир душевный и здравие телесное, да предстательством вашим сподобит нас Господь добраго ответа на Страшнем Судищи Своем, вечных мук избавляя, и царствия Небеснаго купно с вами да удостоит во веки веков. Аминь.



ПОЛНЫЙ АКАФИСТНИК КАНОНИЧЕСКИЙ

АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ

І

НОВОЕ
* НЕБО